


ALAHADY - FAHA 6 MANDAVANTAONA - A



TANO AO AM-PO NY DIDIN-JANAHARY, FA FOTOTRY NY SOA - TSY MISOY "DELESTAGE" AO AMIN'I JESOA

Ry Kristianina havana, amin'izao Alahady faha-06 mandavataona izao mbola manohy ny fandalinam-pinoana isika satria izay rahateo ny maha mandavantaona azy. Ny toriteny teny antendrombohitra izay hahatonga atsika hivelona ny fahasambarana, hahatonga atsika ho fanasina sy fahazavana no mbola tohizantsika ho dinihina. Mikasika ny fahendrena no voasongadina amin'izao Alahady faha-06 izao. Betsaka ny mitady ny fahendrena izany satria io no hahafantarana fa olona feno isika. Ny olon-kendry no afaka mitondra ny asan'Andriamanitra, ny olon-kendry no maneho

Vakiteny I : **Ekl. 15: 15 – 20**

Tononkira : Sal. 111,

Vakiteny II : **1 Kor. 2: 6 – 10**

Evanjely : **Mt. 5: 17 – 37**

amin'ny fiainana ny maha olombanona azy. Raha ny amin'ny sekoly, na fanabeazana no asian-teny eto amin'ny tanindrazantsika : tsy ny harena no tsy misy eto Madagasikara, manan-karena isika fa indrisy ao anatin'ny fahantrana tanteraka, tsy hoe tsy misy manam-pahaizana eto amintsika, ny fahaizana misy fa na izany aza tsy

mandroso isika, tsy hoe lany olona manga isika, maro izy ireo kanefa tsy mahatarika atsika amin'ny tena soatoavina hahafahantsika miroso amin'ny lalindalina kokoa ka hahitantsika fivelarana eo amin'ny fiainantsika andavanandro. Misongadina izany rehetra izany ary tena hita fa sasatra olon-kendry eto amin'ny tanindrazantsika satria tsy misy ny fahamarinana, mitaky an'izany fahamarinana izany izao andro iainantsika izao. Io no mahatonga ny fanabeazana katolika nanapa-kevitra fa beazina sy kolokoloina ao anatin'ny fahamarinana ny taranaka malagasy mba hampisy an'izany olomarina izany satria izay manao ny marina no hendry ary ny marina no maha olona afaka atsika.

Amin'izao Alahady faha-06 mandavantaona izao, ampianarin'ny tenin'Andriamanitra isika mba hahatonga atsika hivelona amin'izany maha Kristianina izany ka ho mpiara-dia amin'i Kristy isika, mba hibanjinantsika tokoa an'i Jesoa mpiara-belona amitnsika araka ny lohahevitra homena atsika "Jesus contemporain". Manampy atsika hahatontosa an'izany no ampianarin'ny vakiteny voalohany (**Ekl. 15: 15 – 20**) : isika raha te ho hendry sy hivelona ny fahamarinana dia tandrovy ny didin'Andriamanitra dia ilay teny folo manambara fa hivelona azy ireo ianao, tenin'ny fianana ireo ka fianana feno ao amin'Andriamanitra ny fiainanao, ka ho lavitra anao ny fahafatesana "*Eo anoloan'ny olombelona ny fiainana sy ny fahafatesana, ka izay fidîny dia homena azy*", raha manaraka ny ratsy isika dia hankany amin'ny fahafatesana, raha manaraka ny didin'andriamanitra isika dia ho velona mandrakizay ka aoka ary hahay hisafidy isika.

Ambaran'i Jesoa izay tamin'ny toriteniny teo an-tendrombohitra : mba hipetraka tsara ny safidintsika, io no manambara fa hendry ianao, hanaraka ny maizina 'izao tontolo izao ve ianao sa hanaraka ny fahazavan'i Kristy ka ho velona mandrakizay, io no safidy sarobidy tsy maintsy ataontsika amin'izao fiainantsika izao

Md Paoly amin'ny vakiteny faharoa (**1 Kor. 2: 6 – 10**) dia mampianatra atsika handinika lalindalina kokoa an'izany rehetra izany, handray an'i kristy izay tena fahendrena ary fahenderena lalina tsy hita polopolorina no nanamboaran'Andriamanitra atsika sy namonjeny atsika ao amin'i Kristy ka anjarantsika no hahay hisafidy satria ilay fahendrena noharian'Andriamanitra atsika dia i Kristy, aoka ho raisintsika izy ka io Kristy no hanilo atsika satria raha ny herintsika olombelona dia tsy hahatakatra izany isika. Araka ny voalazan'i Md Paoly "*Ary tsy nisy nahatakatra izany ny mpanjakan'izao tontolo izao (satria raha nahalala izy, dia tsy ho namàntsika ny Tompon'ny voninahitra tamin'ny Hazofijaliana); fa izany dia anisan'ireo zavatra voasoratra hoe: Zavatra mbola tsy hitan'ny maso na mbola ren'ny sofina, na mbola tafiditra tao am-pon'ny olona velively no namboarin'Andriamanitra ho an'izay tia Azy*"

Izany no fahendrena izany, aoka isika hahay handray ny fanambaran'Andriamanitra.

Matetika isika varimbariana amin'ny zavatra maro ka adinontsika ny "essentiel", ny tena izy amin'ny fiainantsika. "Encombré" loatra ny fontsika ka tsy hahita izy tena fahendren'Andriamanitra isika. Aoka ary ry Kristianina havana izao vanim-potoana misy atsika izao sady miroso tsikelikely isika ho amin'ny karemy, fotoana fandalinam-pinoana, I Jesoa mpiara-dàlana sy mpiara-belona amintsika no hanilo ny fiainantsika, hanilo ny fontsika, hanilo ny fianan'ny fianakaviana, ny fiaraha-monina dia hahazo ny tena fahazavana isika satria TSY MISY DÉLÉSTAGE AO AMIN'I JESOA. Varimbariana isika matetika ao anatin'ny haizina, amin'ny zavatra tsy misy dikany ka araraoty ary izao fotoana izao ry Kristianina havana ; aoka hisafidy an'i Jesoa isika ilay mpiara-belona amitnsika hoy Md Paoly.

Ambaran'i Jesoa amintsika "*Aza ataonareo fa tonga Aho handrava ny Lalàna sy ny Mpaminany; tsy tonga handrava Aho, fa hanatanteraka*" izany hoe tsy i Jesoa no handrava ny fiainantsika fa hanatsara handavorary ny fiainantsika. Izany no fiainana fa anjarantsika no mandray azy, raha izy no avelantsika manamboatra ny fiainantsika dia ho lavorary izany fiainana izany. Mahadiso atsika dia mandeha amin'ny "mécanicien" tsy tena izy isika ka simba ny aotomobilintsika satria mandeha amin'ny "adaptation" isankarazany.

Io "adaptation" ataon'olona amin'ny fivavahana maro samihafa io no matetika koa manimba ny fiainantsika. Mety mandeha izy fa tsy maharitra, ka aoka ary isika mba handeha amin'ny tena "original", io piraty marobe io no manampotika, io no anti-Christ hoy Md Joany ao amin'ny apokalipsa. Aoka isika handray an'i Jesoa fa izy no handavorary ny fiainantsika.

Tsy handrava na hanaratsy izy fa handavorary ka aoka isika tsy ho voafitapiataka. Hoyi Jesoa misy milaza hoe izao no atao, izaho milaza aminareo fa izaho no tena izy.

Ry Kristianina havana, henontsika tsara ny fampianaran'ny Jesoa, *"Efa renareo fa voalaza tamin'ny Ntaolo hoe: Aza mamono olona, ary izay hamono olona dia hohelohina amin'ny fitsarana. Fa izaho kosa milaza aminareo fa izay rehetra mitezitra ny rahalahiny dia hohelohina amin'ny Fitsarana."* Izany hoe aza mitsara olona, aza manaratsy olona fa manatsarà.

"Koa raha manatitra ny fanatitrao eo amin'ny ôtely ianao, ka eo vao mahatsiaro fa manana alahelo aminao ny namanao, dia avelao eo amin'ny ôtely aloha ny fanatitrao, ka mandehana mihavana amin'ny namanao vao miverina hanolotra ny fanatitrao indray"

Aoka hazava tsara ny fiainanao izany hoe raha mihavàna amin'ny olona rehetra.

"Efa renareo fa voalaza hoe Aza mijangajanga",

Aoka hadio mazava tsara ny fiainanareo.

Tsy ny faha-lavorariana no tadiavin'Andriamanitra amintsika fa ho Andriamanitra eo anivon'ny fiainantsika, I Jesoa manamasina, izy ilay masina, ny fahamasinan'ny fiainantsika no tadiavin'Andriamanitra, tsy misy tsy hain'Andriamanitra atao ka raha masina ny fianantsika dia mihalavorary isika, izany no hitantsika amin'ireo olon amasina ankalazaintsika.

Enga anie ato ho ato mba ho lazain'ny Eglizy ho olontsambatra koa i Lucien Botovasoa, izy izay nahatsapa fa tsy mendrika, tsy lavorary ny fiainana fa niezaka izy mba hanamasina ny fiainany, io rahateo ny fampianarana teny an-tendrombohitra nataon'i Jesoa hanampy atsika hanamasina ny fiainantsika. **Izany no nolazain'i Jesoa eto hoe "Efa renareo..." izany hoe tsy maintsy misy "dépassément" ataontsika hanambarana fa olom-baovao ao amin'i Kristy isika, tsy hoe olom-baovao fotsiny fa feno fahendrena izay tena maha olona.**

Raha fintinina ny voalazan'i Jesoa dia manao ny marina isika ka izay manao ny marina no hendry, ary ny marina no maha olona afaka atsika izany hoe miala amin'ny ratsy isika amin'izay.

Ry kristianina havana ,mety hiteny isika hoe sarotra izany rehetra izany, raha ny herintsika dia tsy ho tanteraka fa ny fanahin'Andriamanitra sy ny fahasoavan'Andriamanitra no hahafahantsika hiroso amin'izay soa sy tsara sy ny tena izy, ka ialantsika amin'ireny zavatra mandrakotra ny fiainantsika ireny indrindra fa mba tsy ho voafitaka amin'ireny fampianarana diso isika.

Ry Jesoa Kristy Tomponay ô, ampianaro izahay hikendry ny soa sy ny tsara, mba ho hendry eo amin'ny fiainanay, ho hendry izahay raha ianao no mampianatra anay ny marina, izay manao ny marina no hendry ka amin'izay mahay hampitraotra ny finoana sy ny fiainana andavanandro izahay ka ho zary fanasina sy fahazavana amin'ireo manodidina anay ka hanjaka eto aminay ny fiadananao. Amen